

### Äöpeningsweurdje

**Leif luuj,**

Veur uch ligk de nuutsbreif van mei, wo-in veer alleney gebeurtenisse ónger de loep numme, die zich in april höbbe veurgedaon! Geer zit vás mit sjmart te wachte op de belaevenisse van Audrey, dat de Kennedymars haet geloupe.. Ich verklap 't noe alvás, 't haet de finish gehaald..! En greutsj dat veer zeen. Zo höbbe veer ouch weier Keuninginnedaag gevierd, en waal in Zitterd, in Gelaen en jao.., zelfs in Egypte..! Daonaeve kump dae eine daag sjteeds korter bie.. Dae daag, wo veer Vlemkes mit weemout, mèr, ouch mit sjpas nao oet kieke..! 13 juni! De Zittesje Zeipkisterace.. Wae herinnert zich nog wie veer mit ein grote elegantie en veural vööl sjnelheid dae berg aaf koume gevaeg..? Nou, bereid uch mer veur, veer zeen weier van de pertie..

**Mit de kóplemente,**

Natalie Statnik  
*Sjatmeister*

Óngerwerpe van dees nuutsbreif:

- \* Kennedymars
- \* De Vlemkes viere Keuninginnedaag
- \* Veurbereiding Zeipkisterace
- \* 'Moederdag', wae is de (sjoon)mama van welk Vlemke..?
- \* Wit geer dat...?

### Kennedymars 2010

Leif luuj ,

Biej deze ein (klein) versjlaag van mien belaeving van de Kennedymars 2010.

Om 04.00 oere ging miene wèkker al aaf. Ich hauw gout gesjlaope en waar gout fit. Om op tied in de sjtadssjportal te zeen höb ich mich dan ouch vlot aangedaon en höb ich nog effe sjtevig ontbeete en ben ich mèr meteen begoosj mit ein 'red bull shot'.

Aangekomme in de sjportal waar "Kartoesj" al bezig om de sjtömming d'r gout in te brènge mit hunne "Kennedymars marsj". Om 05.00 oere woort 't sjtartsjot gegaeve en de Kennedymars waar ein feit!

't Waar dit jaor enorm drök en veer zeen ouch heel lang saame blieve loupe. Ich mot zègge dat ut sjtarte al gout ging en de eesjte kilomaeters ginge erg vlot. Om ongeveer 9.30 oere waar ich bij de eesjte pòs (17km).



Noe begoosj dae ganse grote groep ein bietje oeterein te valle en jederein leip in zien eige tempo wieër. Ich mot zègge dat ich d'r al een aantal zoug trèkke mit de bein en ein aantal zoug die krampe kreege. Bij mich waar veuralsnog niks aan de handj,...

Om 13.30 oere waar ich al enorm opgesjaote en zoug ich de tweede pòs al veur mich (28km). Ich mot zègge dat ich vanaaf dat moment toch waal zjwaor bein kreeg, mèr de mout zout d'r nog gout in en ich leip fein wieër nao de volgende pòs.

Jao,... en toen ich in Wessem (38km) aankoum woort 't toch waal lestig, pès in Montfort waar het dreug en af en toe een zelfs ein bietje zonnig. Mèr in Wessem begoosj 't mich toch te raegene! Ich vuilde natuurlik aan mien water dat dit neit miene einigste openbare douche ging waere, mèr dat 't ein van de eesjte van vöole waar die nog zouwe volge daen daag. Ich besjloot eine kleine sjtop te maake en in ein kafeeke mich ein bietje op te werme en te dreuge. Naodat ich mich zelf èns sjtremg hauw toegesjproke in de sjeigel oppe wc, ben ich mer weier wieër gegange. Mèr wat waar 't zjwaor!

Thoor (51km)!! Yes, ich waar ruum euver de hellef haer!.. Mien vuitjes hauwe 't zjwaor om mich te draage,... (En wie geer wit zal dat neit aan mien gewich gelaege höbbe) Gelökkig hauw ich nog gein blaore en de tape om de vuit zout nog gout. Ut waar òngertösje 15.30 oere gewaore en ich höb mich zelf een bietje aafgeleid door mèr eens gout nao te gaon dènke waat ich 'zometein' bij de frit wol höbbe,...



't Aantal kilomaeter per oer waar noe toch een bietje aaf aan 't numme, en 't leek sjus of dat de sjtoeprandj inèns eine meter hoog waar gewoore! In Deiteren (67km) hauw ich de famieje bij mich om mich aan te moedige veur de lètste kilomaeters. Ut waar ongeveer 17.15 oere wie d'r nog 33 kilomaeter oppe teller sjtonge. Ongerwaeg zeen d'r veul hermeniekes gewaes en vööl luuj sjtònge langs te kantj om de Kennedymars-luipesj aan te moedige. Ich vonj dit super, veural omdat 't waer zo sjlech waar.

Nao 77km waar 't ènj ech in zich, ich leip dan waal niet meer zo vlot en messjiens waal ein bietje sjeif. Mèr...om 20.26 oere bèn ich mit muziek, geklap, gejuich en bloume bènne gekomme in de sjtadssjportal. Muig mèr voldaan, mit de tòng oppe sjoon en pratsj naat van de raege höb ich mich gans greutsj mien driede medaaje in ontvangs genomme. En noe,... ein frietje mit ein saté kroket...

Door: Audrey

**De Vlemkes viere keuninginna daag..**

30 april waar 't weier zo wiet.. De verjaardaag van de keuningin. Van Juliana natuurlijk hè.., neit van Beatrix. Hüb geer 't allemaol gezeen oppe televisie? Dat verraegende pak van Wim-Lex waar toch neit om aan te zeen. Jao.. de keuninklijke perpluue waere neit aan te sjeipe dao in Wemeldingen!

Mèr, hiej in ós sjone Zitterd sjeen 't zunke volop! Toch haet dat twee Vlemkes niet taegge gehouwte om dit kikkerlandje te ontvluuchte en hunne keuninginna daag te gaon viere in Egypte, tösje de Farao's en de Sphinx. Jao, Joyce G. en Anne laote 't zich dao gout gaon. En die oranje kleier kènne ze ouch nog in juni gebroeke, zullen veer mer zègge..

Ongertösje haet de rès van de Vlemkes zich èns laote gaon op de rommelmert in 't park. Veer zeen namelijk op zuik nao....: eine skelter veur de zeipkisterace, en t leefste eine wo veer mit zien tweë op kènne. Dit jaor hóbbe veer mer besjlaote ein kis mit ein sjtuur aan te sjaffe.. Dat geit waal zo gemakkelik dae berg aaf. Ich weit nog neit of dr Vlemkes zeen die sukses hobbe gehad op dae rommelmert, mer laote veer t haope, veural veur de veiliheid van de luuj langs de kantj bie de zeipkisterace. Mèr dit sjpektakel kump in ein anger sjtökske aan de beurt..

Ichzelf en Joyce T. hóbbe ozze verkoupkwaliteite in de sjtried gegooid. Zoès geer wit, haet Joyce T. eine Jamin-winkel in Gelaen.. Wo..? Jao, in Gelaen, 't is 'm vergaewe, zolang 't mer gans vööl snoepjes en veural sjoklaat mitnump nao de vergaderinge.. En tot nog toe haet 't zich dao sjtrik aan gehouwte. En noe de lente weier is aangebraoke, zeen de ieskes ouch weier van de pertie bij Joyce T. in de winkel.. En wo zo eine lekkere 'Twizzl' te krieger is, dao ben ich zeker ouch te vènje. Dus zo koum 't dat ich op keuninginna daag eine heleboel ieskes hób sjtaon make.. Twee veur de klantje en dan eine veur Natalie.. Zo hób ich dat ein paar urkes vol gehouwte, mer van al dat ies krig ze 't ... ja, koud..!



Ouch dao hauw Joyce T. bie naogedach.. 'T hauw ouch lekkere, werme waffe.. Geer sjnap waal, dat al die gouwe veurnummes veur deze zomer effekes aan de kantj zeen gezat wie al dat lekkesj te krieger waar. Ich zal dees waek waal weier ein paar keer extra motte gaon sjporte om al die kalorië te kompenseiere.. Och, 't is mer eine keer keuninginna daag in 't jaor, toch..?

Door: Natalie

**Veurbereiding Zeipkisterace?!**

Geer kènt ze waal, die rood mit witte envelope die in de breivebus valle. Veer van de Vlemkes hóbbe dao ouch ervaring mit. Aangezeen veer bès ein paar sjeurmonsters bènne de vereniging hóbbe, kump dat regelmaotig veur. Wie de vraog koum of veer mit wolle doon aan de zeipkisterace 2009 houfde veer dus neit nao te dènke. De praktijk waar toch ein bietje angesj. De bolide waar super, mèr toen mousjte veer dae berg ouch nog aaf. Dat waar mekkelikker gezag, dan gedaon. D'r louge namelijk get vööl bènj op de weg. Gein idee wie die dao koume?! Ouch leipe nog gèt luuj in de waeg. Die houwe 't zebraaad gemis.





Kortom: ozze aankòmstied waar neit om over nao hoes te sjrieve. Om 't nog mèr neit te hõbbe euver de fysieke toesjtandj van sommige Vlemkes. Dit jaor geit dat angesj, hõbbe veer vol gouwe mout gezag. Mèr wie? Watte? Sjtootkussekes? Aerodynamische sjtootkussekes? Of messjien motte veer toch Michael Angelo, nae Jackson? Nae dae Pruis vraoge, dae Sjoonmaker vraoge. Veer motte nog èns gout naodènke, d'r zal vàs ein briljant idee kòmme. Wie dan ouch, veer zulle d'r sjtoan. Es einigste vrouluuj-team. Ich vènj dat veer dao allein al eine pries veur mòtte kriege.

Pee ès: de Vlemkes zeen dit jaor neit compleet mit de zeipkisterace. Wae zich geroupe vuilt om òs te òngersjteune bie dae 'dodenrit' nao ònger, is wilkom. Enne, veer zeen neit zo kieskeurig.. Bès doe eine man, kènse hel nao ònger vaare en zuuste gout oet in ein pruuk en hakke, dan hõbbe veer dich gaer d'r bie..!

Meld dich aan door ein sjoon foto + motivatie te sjikke nao [info@devlemkes.nl](mailto:info@devlemkes.nl).  
[www.zeipkis.nl](http://www.zeipkis.nl)

Door: Marjolein

**'Moederdag', wae is de (sjoon)mama van welk Vlemke..?**

"Lieve mama,  
 Een moeder kun je zelf niet kiezen,  
 maar als dat zo zou gaan,  
 dan had jij op mijn lijstje  
 helemaal bovenaan gestaan!"



A.



B.



C.



D.



E.



1.



2.



3.



4.



5.



6.

Kiek veur de oplossing onger aan dees nuutsbreif!

### Wit geer dat....?

- De Vlemkes op zaoterdig 24 april eine richtige vrouluuj-aovend hōbbe gehad..
- Dat veer toen bie Angelique van 'Schtad Zitterd' heerlijk hōbbe gegaete..
- Dat de Rosé daobiej riekelik vloiede..
- Dat veer daonao Zitterd onveilig hōbbe gemaak, mēr toch weier braaf om drie oere in bēd louge..
  
- Dat vief van de ach Vlemkes in mei op vakantie gaon.. (Wiezo.. kredietcrisis..?)
- Dat geer ein oetgebred versjlaag hiejvan krig in de volgende nuutsbreif.. Messjien waal mit ein foto van ein bikini..? Messjien waal mit ein Vlemke d'r in..!
- Dat veer haope dat de Ieslandse vulkaan daarom sjtil blif..
  
- Dat de Vlemkes gesjmink hōbbe mit de Kènjerrevuuj..! En waal 180 kènjer..!
- Dat zie laame erm hōbbe gekrege daovan..
- Dat Marjolein de zenuwe op de blaos waare gesjlage..
- Dat zie daarom mee tied oppe WC haet doorgebracht ès achter de regietaofel..
- Dat de Kènjerrevuuj toch ein groot sukses waar..

### Óngerwerpe nuutsbreif 6

In de nuutsbreif 6 kènt geer ónger angere laeze euver:

- \* Rubriek 'Modeplisse'
- \* Vlemkes op vakantie
- \* Groove Garden
- \* Rubriek 'Wit geer dat...?'
- \* En nog mee, en nog mee, en nog vāöl mee!!